



XUNTA
DE GALICIA

RECOMENDACIÓNS PREVENTIVAS DE SAÚDE LABORAL ANTE O CORONAVIRUS NO COMERCIO

23 de xullo de 2020



issga.xunta.gal



INTRODUCCIÓN

En base á información e ás recomendacións da autoridade sanitaria, elabórase esta **guía de boas prácticas preventivas de saúde laboral ante o coronavirus no comercio** que ten como finalidade orientar as súas actuacións na fase de reactivación da súa actividade para garantir a saúde laboral das persoas traballadoras.

Nesta guía recóllense unha serie de **recomendacións e medidas de contención adecuadas** para a protección do persoal laboral e da propia clientela ante a exposición ao coronavirus SARS-CoV-2.

As **solucións** para implantar en cada comercio deberán analizarse individualmente para **adaptalas á súa singularidade** e revísarse en función das medidas que vaia actualizando a autoridade sanitaria.

Con carácter máis xeral, deben considerarse tamén as recomendacións para a volta ao traballo recollidas no documento *Protocolo e guía de boas prácticas dirixida á actividade comercial en establecemento físico e non sedentario*, así como os criterios xerais que se establecen no *Procedemento de actuación para os servizos de prevención de riscos laborais ante a exposición ao SARS-CoV-2*.

INFORMACIÓN BÁSICA SOBRE A COVID-19

➤ O SARS-CoV-2 é un novo tipo de coronavirus que pode afectar ás persoas causándolles a enfermidade **COVID-19**. O **período de incubación** medio é de 5-6 días, variando de 1 a 14 días. O 97,5% dos casos sintomáticos desenvólvense nos primeiros 11 días e medio tras a exposición.

➤ **Transmítese** por contacto directo coas **pingas respiratorias** que se emiten coa tose ou o esbirro dunha persoa enferma. O seu contaxio depende da cantidade do virus nas vías respiratorias. Estas pingas infectan a outra persoa a través do nariz, os ollos ou a boca directamente. Tamén poden infectar ao tocar o nariz, ollos ou boca coas mans que tocaron superficies contaminadas por estas pingas. Parece pouco probable a transmisión polo aire a distancias maiores de 2 metros. Actualmente considérase que a transmisión da infección comeza **1-2 días antes do inicio de síntomas**. A maioría das persoas adquiren a COVID-19 doutras persoas con síntomas.

➤ Non se sabe con certeza canto tempo sobrevive o virus causante da COVID-19 nunha superficie, pero parece comportarse como outros coronavirus. Os estudos realizados (incluída a información preliminar dispoñible sobre o virus da COVID-19) indican que os coronavirus **poden subsistir nunha superficie desde unhas poucas horas ata varios días**. O tempo pode variar en función das condicións (por exemplo, o tipo de superficie, a temperatura ou a humidade ambiental).

➤ Os **síntomas** máis comúns son **febre, tose, sensación de falta de aire e outros síntomas** considerados de **sospeita de infección** segundo o criterio clínico. A maioría dos casos presentan síntomas leves e pode haber persoas que non presenten síntomas. En casos máis graves a infección pode causar pneumonía, dificultade importante para respirar, fallo renal e mesmo o falecemento.

► **Os principais grupos vulnerables** son as persoas con diabetes, enfermidade cardiovascular, incluída hipertensión, enfermidade hepática crónica severa, enfermidade pulmonar crónica, insuficiencia renal crónica, inmunodepresión, cancro en fase de tratamento activo, obesidade mórbida (IMC>40), embarazo e maiores de 60 anos.

► O **maior risco de contaxio** céntrase no persoal sanitario asistencial e non asistencial que atende un caso confirmado ou en investigación con síntomas, cun contacto estreito. En xeral, débense considerar de maior risco aquelas profesións nas que se poida producir un contacto estreito con persoas infectadas.


► En tanto non exista un tratamento eficaz, a mellor maneira de previr **a enfermidade é evitar o contacto entre persoas e cumprir coas medidas de hixiene e limpeza**, sempre apelando á responsabilidade individual e colectiva para evitar a transmisión.

► A **Organización Mundial da Saúde (OMS)** declarou o pasado 30 de xaneiro a situación de “emergencia de saúde pública de

importancia internacional”. Posteriormente, o 11 de marzo de 2020 declarou a COVID-19 como pandemia a nivel mundial.

► En España, o 14 de marzo de 2020, o Consello de Ministros aprobou o Real Decreto 463/2020 polo que se declaraba o **estado de alarma para a xestión da situación de crise sanitaria ocasionada pola COVID-19**, e o 28 de abril o Plan para a transición cara unha nova normalidade, establecendo catro fases, en función delas, fóronse modificando as medidas e as obrigas. O 13 de xuño aprobouse o Decreto 90/2020 polo que se declara a superación da fase III do Plan para a desesfacer fronte á pandemia da COVID-19 na Comunidade Autónoma de Galicia. As medidas que son de aplicación en todo o territorio da Comunidade Autónoma de Galicia establécense na “RESOLUCIÓN do 12 de xuño de 2020, da Secretaría Xeral Técnica da Consellería de Sanidade, pola que se dá publicidade do Acordo do Consello da Xunta, do 12 de xuño de 2020” (DOG núm. 115) e posteriores modificacións.

MANTÉN AS DISTANCIAS



MEDIDAS AO COMEZO DA ACTIVIDADE

➤ As persoas que experimenten algúns dos **síntomas máis comúns compatibles coa COVID-19**, tales como febre ($> 37^{\circ}\text{C}$), calafríos, tose, sensación de falta de aire, diminución do olfato e do gusto, dor de garganta, dores musculares, dor de cabeza, debilidade xeral, diarrea ou vómitos, deberán permanecer no seu domicilio, informar á empresa e comunicalo ao seu servizo sanitario coa maior brevidade. O servizo sanitario do departamento de prevención de riscos laborais será o encargado de establecer os mecanismos para a investigación e seguimento dos contactos estreitos no ámbito das súas competencias, de forma coordinada coas autoridades de saúde pública.

LIÑA DE ATENCIÓN
900 400 116

➤ **Non deberá acudir** ao posto de traballo ata que se confirme que non hai risco para a persoa traballadora ou para os demais.

➤ **As persoas traballadoras que estiveron en contacto estreito**, entendido como máis de 15 minutos a distancias inferiores a 2 metros, cunha persoa enferma tampouco deben ir traballar, mesmo en ausencia de síntomas, durante 14 días. Deben estar en alerta por se aparecen síntomas desta enfermidade.

➤ **As persoas traballadoras especialmente sensibles á COVID-19** son as que están incluídas nos grupos vulnerables e, ademais, a valoración do seu posto de traballo determinou que existe un risco medio, alto ou moi alto en relación coa exposición ao SARS-CoV-2. Non se terá en conta o risco baixo por ser similar ao comunitario.

• **As persoas traballadoras do réxime xeral da Seguridade Social** serán valoradas polo persoal sanitario do servizo de prevención de riscos laborais (SPRL) e de ser cualifi-

cadas como especialmente sensibles, deberán propoñerse as medidas preventivas adecuadas para minimizar o risco no medio laboral (colectivas ou individuais, adaptación de tarefas, recolocación...). Se non se poden adoptar as medidas preventivas, o médico do traballo do SPRL emitirá un informe para o médico de atención primaria.

• **As persoas traballadoras autónomas sen asalariados ao seu cargo** serán valoradas pola Inspección de Servizos Sanitarios e o resultado será comunicado ao médico de atención primaria, se procede a situación de incapacidade temporal será quen emita o parte. As solicitudes presentaranse pola persoa interesada ou polo seu representante legal mediante o procedemento PR004A (<http://sede.xunta.gal/tramitar/PR004A>).

• **As persoas traballadoras autónomas con asalariados ao seu cargo** deberán presentar un informe asinado polo médico de traballo dun SPRL nos mesmos termos que os sinalados para os traballadores do réxime xeral da Seguridade Social.



➤ **O médico de Atención Primaria do Sergas** será quen poderá **emitir a baixa e a alta laboral** ao persoal traballador afectado polo coronavirus, tanto nas situacións de enfermidade, de illamento preventivo e a outro persoal que o precise como é o caso dos especialmente sensibles sen posibilidade de adoptar as medidas preventivas adecuadas.

➤ Considérase **unha situación asimilada a accidente de traballo para a prestación económica**, pero a continxencia para cubrir será sempre de enfermidade común.

MEDIDAS NOS DESPRAZAMENTOS AO TRABALLO

➤ Nos **desprazamentos** teranse en conta as opcións de mobilidade:

- Sempre é **mellor** utilizar un medio de **transporte individual**.

- No **transporte compartido** **precísase máscara** se os ocupantes non conviven no mesmo domicilio.

- No **transporte colectivo** **é obrigatorio o uso de máscara**, e seguiranse as indicacións de mobilidade.

- En caso de ir ao traballo **camiñando** ou en bicicleta, é obrigatoria a **máscara aínda que se poida gardar a distancia interpersonal** de 1,5 metros.

- Na **moto** non se precisa, se os ocupantes usan casco integral ou son conviventes.

- En todo tipo de transporte seguiranse as regras de **uso de máscaras e mobilidade indicadas** en cada momento polas autoridades.




MEDIDAS PARA GARANTIR A DISTANCIA DE SEGURIDADE

➤ Unha das formas máis efectivas para minimizar a propagación do coronavirus é **limitar a proximidade física entre o persoal, clientela e provedores**. Para iso propóñense as seguintes medidas:

- **Controlar o aforo máximo permitido** para garantir a distancia de seguridade de 1,5 metros entre as persoas no interior.

- **Establecer un horario de atención preferente** para as persoas maiores de 65 anos.

- **Organizar a entrada da clientela** por quendas e respectar a distancia estipulada durante a espera.



- O uso de **ascensores e montacargas** limitarase ao imprescindible priorizando o uso das **escaleiras**. Cando sexa necesario utilízaos, a súa ocupación máxima será do 50% da súa capacidade e será obrigatorio o uso de máscara por parte das persoas ocupantes, nos termos indicados pola normativa vixente.

- **Permanecer** no local o **tempo indispensable** para a compra.

- **Sinalizar o chan mediante** cintas adhesivas ou postes separadores que proporcionen distancias mínimas entre a clientela que fai cola para ser atendida, a caixa, etc.

- Procurarase **manter a distancia de seguridade interpersoal de 1,5 metros** entre os traballadores e o público ou, na súa falta, utilizaranse medidas alternativas de protección física. **O uso da máscara será obrigatorio**, aínda que se manteña a distancia de seguridade interpersoal nos termos previstos na normativa vixente.

- **Organizar o percorrido de entrada e saída** para dirixir o fluxo de persoas que entran e saen do comercio co fin de evitar o contacto.

- **Fixar horarios** para atender aos representantes comerciais e establecer as pautas de seguridade para a recollida da mercadoría.



- **Fomentar o comercio online** con servizo de entrega a domicilio, extremando tamén as precaucións. Se non é posible a entrega a domicilio, contemplarase a posibilidade de habilitar **servizos de recollida no comercio** en zonas especificamente destinadas para iso evitando as aglomeracións.

- **Establecer quendas de traballo** para evitar posibles contactos e garantir a continuidade da actividade.

- **Distribuír as tarefas entre o persoal** de forma que se garanta a distancia mínima establecida.

- A ocupación máxima dos **aseos** será dunha persoa para espazos de ata **4 m²**, salvo naqueles supostos de persoas que poidan precisar asistencia, en cuxo caso tamén se permitirá a utilización polo seu acompañante. Para aseos de máis de 4 m² con máis dunha cabina ou urinario, a ocupación máxima será do 50% do número de cabinas e urinarios que teña a estancia e deberá manterse durante o seu uso a distancia e seguridade interpersoal.

- **Utilizar preferentemente o pago con tarxeta ou móbil** sempre que sexa posible para evitar o contacto coa clientela.



- O uso de **máscara** é obrigatorio en comercios xa que é un espazo aberto ao público no que se pode concorrer con outras persoas usuarias.

MEDIDAS HIXIÉNICAS

➤ Facilitar solucións **hidroalcohólicas, luvas desbotables e colocar contedores** con tapa, pedal e bolsa recamiabíles nos accesos ao comercio para uso público, limpálas con frecuencia e polo menos unha vez ao día.

➤ **Deberase utilizar máscara hixiénica/cirúrxica** durante a estancia no comercio.

➤ **Dispoñer de produtos** para a hixiene de mans (xabón, solucións hidroalcohólicas e panos desbotables) e para a limpeza e desinfección (deterxente habitual, lixivia ou outros produtos autorizados). Dotar ao persoal de **material suficiente**.

➤ **Facilitar o lavado frecuente de mans**, solucións hidroalcohólicas e luvas desbotables ao persoal traballador.

➤ **Buscar a mellor maneira de protexer o produto** para evitar a súa contaminación pola exposición e manipulación.

➤ **Eliminar os produtos de mostra** salvo os de telecomunicacións que se poderán probar baixo supervisión.

➤ Solicitar á clientela que **non manipule os artigos** que non vaia comprar.

➤ Ter ao alcance dos clientes só as **pezas imprescindibles**, por exemplo, unha por modelo, para que o persoal do comercio teña un maior control e evitar que sexa manipulada pola clientela.

➤ **En relación cos probadores:**

● **Unha soa persoa** por probador.

● **Valorar o cambio de cortinas** por paneis ou portas para facilitar unha mellor limpeza. No caso de que se acceda mediante **cortina** e non sexa viable a substitución,

establecer instrucións para **non tocar a coa man, retirala con luvas ou o cóbado**.

● **Limpeza e desinfección despois de cada uso** con lixivia diluída (2 culleradas por litro de auga ou se é comercial respectando as indicacións do produto) ou un produto virucida autorizado polo Ministerio de Sanidade, incluíndo todos os elementos do seu interior (espellos, asentos, colgadoiros, etc.). Empregue sempre **procedementos e produtos recomendados** polas autoridades sanitarias, entre os que non se encontra o ozono.

● **Utilizar calzas desbotables** para probar zapatos e gorros desbotables para sombreiros.

● **Seleccionar o número de pezas a probar**. Para o control do número de pezas utilizar elementos que se poidan refugar e que en ningún caso se compartan.

● No caso de que un cliente probe unha peza que posteriormente non adquira ou no caso de que a devolva, o titular do establecemento **implementará medidas** para que a peza sexa **hixienizada** antes de que sexa facilitada a outros clientes.

➤ **Fomentar o uso de medios telemáticos** (ordenador e dispositivos móbiles) para xestionar a axenda, a recepción de albarás e a emisión de facturas.

➤ **Evitar compartir material de traballo** como ordenadores, datáfonos, lectores de códigos, etiquetadora e outros obxectos sen limpalos previamente.

➤ **Lavar de forma regular e cos produtos recomendados** os uniformes ou roupa de traballo, polo que se podería valorar o aumento de dotación dos mesmos. Levaranse en bolsas pechadas para o seu lavado. Recomen-

dase un lavado cun ciclo completo a unha **temperatura de >60°C** ou utilizar aditivos para a desinfección cando o tecido non admita esa temperatura.

➤ **Reforzar as tarefas de limpeza e desinfección do local e das superficies** que máis se tocan (mostradores, pomos de portas, computador, TPV, probadores, aseos, etc.). É necesario limpar a área de traballo cando hai cambios de persoal. Realízala polo menos unha vez ao día. Os deterxentes habituais son suficientes, aínda que tamén se pode contemplar a incorporación de lixivia ou outros produtos desinfectantes ás rutinas de limpeza, sempre

en condicións de seguridade e segundo as recomendacións da autoridade sanitaria.

➤ **O persoal que realice a limpeza** unha vez finalizado o seu traballo e tras despoñerse de luvas e máscara, debe realizar unha completa hixiene de mans, con auga e xabón, polo menos 40-60 segundos.

➤ **Ventilar** o local como mínimo de forma diaria e durante o tempo necesario para asegurar a renovación do aire. Asegurar a renovación igualmente se hai sistemas de climatización ou ventilación instalados e vixiar o seu correcto funcionamento e mantemento.

MEDIDAS ORGANIZATIVAS

➤ **Informar e formar ao persoal** sobre os riscos de contaxio e propagación do coronavirus, con especial atención ás vías de transmisión e as medidas de prevención e protección adoptadas.

➤ É preciso establecer **protocolos de actuación** no caso de que unha persoa traballadora manifeste síntomas da COVID-19 no seu posto de traballo, para protexela a ela e ao resto do persoal.

➤ Colocar **carteis en zonas visibles** do comercio que advirtan á clientela sobre as medidas organizativas e de distanciamento físico establecidas polas autoridades sanitarias e sobre a súa obrigação de cooperar no seu cumprimento.

➤ **Modificar a disposición dos postos**, a organización das **quendas** e o resto de condicións de traballo, para manter a dis-

tancia de seguridade mínima de 1,5 metros entre o persoal.

➤ **Organizar a circulación de persoas**, e a distribución de espazos (mobiliario, andeis, corredores, liña de caixas, etc.).

➤ Ter suficiente **material de protección**, especialmente **máscaras e luvas desbotables**, para o persoal traballador.


➤ Dispoñer dunha provisión **suficiente de material** para poder realizar as tarefas de **limpeza e desinfección** reforzada e diaria. Entre eles, lixivia e produtos autorizados polo Ministerio de Sanidade para desinfectar en condicións de seguridade segundo as indicacións do fabricante. (ver o apartado *Outra información de interese*).

➤ Dar pautas de actuación ante posibles **situacións de estrés laboral** polo contexto actual.


• Técnica do lavado de mans con auga e xabón •




Humedecer as mans.



Aplicar suficiente xabón.




Fregar palma sobre palma.




Fregar palma sobre dorso dos
dedos entrelazados e viceversa.




Fregar palma sobre palma cos
dedos entrelazados.




Fregar o dorso dos dedos sobre a
palma oposta.



Fregar os polgares mediante un
movemento rotatorio.




Fregar as xemas dos dedos sobre
a palma da man contraria cun
movemento circular.



Fregar cada pulso coa man oposta.




Aclarar con auga.



Pechar a billa co cóbado ou ben
cunha toalla desbotable.




Secar cunha toalla de papel
desbotable.




Este proceso debe levar entre
40 e 60 segundos.


• Técnica de hixiene das mans con preparacións alcohólicas •



Depositar na palma da man unha dose de produto suficiente para cubrir todas as superficies a tratar.




Fregar as palmas das mans entre si.




Estender o produto entre os dedos.




Fregar as palmas das mans entre si, cos dedos entrelazados.




Fregar o dorso dos dedos dunha man coa palma da man oposta, agarrándose os dedos.




Fregar cun movemento de rotación o polgar esquerdo atrapándose coa palma da man dereita e viceversa.




Fregar a punta dos dedos da man dereita contra a palma da man esquerda, facendo un movemento de rotación e viceversa.



Fregar cada pulso coa man oposta.



Esperar ata que o produto se evapore e as mans estean secas (non use papel nin toallas).



Este proceso debe levar entre 20 e 30 segundos.

MEDIDAS DE PROTECCIÓN PERSOAL

➤ Será **obligatorio o uso da máscara** en todo momento, tanto cando se estea na vía pública e en espazos ao aire libre como cando se estea en espazos pechados de uso público ou que se encontren abertos ao público, **aínda que se poida garantir a distancia de seguridade interpersoal**. Preferiranse as máscaras hixiénicas e cirúrxicas, que cubrirán o nariz, a boca e a barbela.

➤ O emprego de máscaras na comunidade é **unha medida complementaria** e non substitúe as medidas preventivas establecidas como, por exemplo, distanciamento físico, etiqueta respiratoria, hixiene de mans e evitar tocar a cara, o nariz, os ollos e a boca. Si pode servir como un medio de control da fonte de infección ao reducir a propagación na comunidade, xa que se rebaixa a excreción de pingas respiratorias de individuos infectados que aínda non desenvolveron síntomas ou que permanecen asintomáticos.

➤ **As máscaras hixiénicas** deberán responder a estándares de calidade certificados ao mesmo nivel que as máscaras cirúrxicas ou médicas (Norma EN 14683:2019+AC:2019), o que exclúe os produtos fabricados con outro tecido, tricotado ou papel. Poden ser **reutilizables** (especificación técnica UNE 0065:2020) ou **non reutilizables** (especificación técnica UNE 0064-1:2020).



O seu uso pode **colaborar na diminución da transmisión** por parte de persoas sen síntomas ou con síntomas leves, sempre que se faga asociado ás medidas de prevención.

➤ **As máscaras cirúrxicas ou médicas**, que deben ser un produto sanitario homologado, serán sempre as elixidas polas persoas que pertencen aos grupos vulnerables á COVID-19.

O seu uso **limita a saída das pingas respiratorias** polo que prevén a transmisión do virus a outras persoas e ten un efecto protector, se se usa de maneira adecuada e asociado ás medidas de prevención. Para iso é imprescindible que encaixe ben na cara, se tolere ben e se teñan as precaucións de uso correcto das máscaras.

➤ **A máscara de protección individual EPI (tipo FFP2)** só é recomendable nos casos prescritos polo servizo de prevención, que debe indicar o seu uso, tipo, tarefas e situacións nas que se debe usar. A máscara non deberá estar provista de válvula exhalatoria, agás nos usos profesionais para os que este tipo de máscara poida estar recomendada.

A mellor forma de previr a **transmisión** é usar unha combinación de todas as medidas preventivas. Os equipos de protección individual (EPI), de considerarse, serán un complemento.

➤ **Usar e refugar** as máscaras e os EPI de forma adecuada para previr a infección. Lavar sempre as mans antes de poñelos e despois de quitálos. Evitar igualmente tocar a cara cando se leven postos.

➤ É necesario **garantir a subministración de material de protección**, de maneira especial máscaras e luvas, segundo as indicacións do servizo de prevención de riscos laborais e das autoridades sanitarias.

MEDIDAS NO CASO DUNHA SOSPEITA DE COVID-19

➤ No caso de que **unha persoa traballadora presente sintomatoloxía compatible** coa enfermidade, retiraráselle da súa actividade profesional, illaráselle e dotaráselle dunha máscara cirúrxica. Contactarase cos servizos de saúde chamando ao teléfono de atención **900 400 116** ou ao médico de atención primaria.

➤ O **servizo sanitario do SPRL** será o encargado de establecer os mecanismos para a investigación e seguimento dos contactos estreitos no ámbito das súas competencias, de forma coordinada coas autoridades de saúde pública.



O uso de máscara non debe nunca obviar a importancia do seguimento estrito das medidas xerais recomendadas para a prevención da infección por coronavirus, insistindo na importancia de manter a distancia de seguridade; a hixiene de mans frecuente con auga e xabón ou solucións hidroalcohólicas; ao tusir ou esberrar, cubrir a boca e o nariz co cóbado flexionado; usar panos desbotables e tirar estes tras o seu uso, así como evitar tocar os ollos, o nariz e a boca.



COLOCACIÓN CORRECTA DA MÁSCARA HIXIÉNICA OU CIRÚRXICA

Lavar as mans con auga e xabón antes de manipular a máscara. Identificar a parte superior e/ou o lado correcto desta. Colocala na cara e axustar, se dispón dela, a pinza nasal ao nariz.



Colocar ben as bandas, segundo modelo. Por detrás das orellas ou a banda superior pola parte da cabeza e a inferior pola parte de atrás do pescozo.


Baixar a parte inferior da máscara á barbela e verificar que esta queda cuberta na súa totalidade.



Presionar a pinza nasal, se a ten, cos dedos índices de ambas as dúas mans para axustala ao nariz. Verificar que a máscara está colocada correctamente, comprobando o selado e a ausencia de molestias respiratorias.

Unha vez axustada, non tocar a máscara coas mans. Se o usuario necesita tocar a máscara, debe previamente lavar as mans con auga e xabón ou refregalas cunha solución hidroalcohólica.

XEITO CORRECTO DE POÑER E RETIRAR AS LUVAS



- **Paso 1:** Lavar as mans antes de poñer as luvas.
- **Paso 2:** Retirar as luvas e refugalas.
- **Paso 3:** Lavar as mans despois de quitar as luvas.

MEDIDAS PARA A XESTIÓN DOS RESIDUOS NO CENTRO DE TRABALLO

› Xestionar os **residuos ordinarios** do modo habitual.

› O material de hixiene persoal (**luvas, máscaras ou panos**) desbotaranse en papeleiras ou contedores con tapa, pedal e bolsa recambiable e depositarase na fracción resto.

› No caso de que unha **persoa traballadora presente síntomas** mentres se atope no seu posto de traballo, será preciso **illar o**

contedor onde depositase **panos ou outros produtos usados**. Esa bolsa de lixo deberá ser extraída e colocada nunha segunda bolsa de lixo, con peche, para o seu depósito na fracción resto.



MEDIDAS PARA O PERSOAL TRABALLADOR

› **Cumprir** con todas as medidas de prevención que lle indique a empresa.

› Manter a **distancia de seguridade** (aproximadamente 1,5 metros) e utilizar a **máscara** hixiénica ou cirúrxica nos termos indicados pola normativa vixente.

› **Evitar** o saúdo con contacto **físico**, incluído o dar a man.

› **Non utilizar equipos e dispositivos** doutras persoas traballadoras. No caso de que sexa necesario, aumentar as medidas de precaución e desinfectalos antes de usalos. Se non é posible, lavar as mans inmediatamente despois de usalos.

› **Lavar frecuentemente as mans** con auga e xabón, ou cunha solución hidroalcohólica.



É especialmente importante lavarse despois de tusir ou esberrar ou despois de tocar superficies potencialmente contaminadas. Tratar de que cada lavado dure polo menos 40 segundos.

› **Cubrir o nariz e a boca** cun pano desbotable ao tusir e esberrar, e desbotalo a continuación nun contedor con tapa, pedal e bolsa recambiable. No caso de non dispoñer de panos, empregar a parte interna do cóbado para non contaminar as mans.

› **Evitar tocar** os ollos, o nariz ou a boca, xa que as mans facilitan a transmisión do virus, tamén cando use máscaras e/ou luvas.

› **Facilitar** o traballo ao persoal de limpeza cando se abandone o posto, despexándoo o máximo posible.

› **Tirar** calquera refugallo de hixiene persoal, especialmente os panos desbotables, de forma inmediata ás **papeleiras** ou contedores habilitados.

› **No caso de presentar síntomas no traballo**, debe comunicalo á empresa e contactar de inmediato co teléfono de atención **900 400 116** ou co médico de atención primaria.

OUTRA INFORMACIÓN DE INTERESE

- ▶ **Organización Mundial da Saúde (OMS):**
https://www.who.int/health-topics/coronavirus#tab=tab_1
- ▶ **Ministerio de Sanidad:**
<https://www.mscbs.gob.es/en/profesionales/saludPublica/ccayes/alertasActual/nCov-China/home.htm>
- ▶ **Centro Europeo para a Prevención e o Control de Enfermidades (ECDC):**
<https://www.ecdc.europa.eu/en/novel-coronavirus-china>
- ▶ **Consellería de Sanidade. Xunta de Galicia:**
<https://coronavirus.sergas.es/>
- ▶ **Procedemento de actuación para os servizos de prevención de riscos laborais fronte á exposición ao novo coronavirus (SARS-CoV-2) (14 de xullo 2020):**
https://www.mscbs.gob.es/profesionales/saludPublica/ccayes/alertasActual/nCov-China/documentos/Proteccion_Trabajadores_SARS-CoV-2.pdf
- ▶ **Información científico-técnica, enfermidade por coronavirus, COVID-19 (3 de xullo de 2020):**
<https://www.mscbs.gob.es/en/profesionales/saludPublica/ccayes/alertasActual/nCov-China/documentos/ITCoronavirus.pdf>
- ▶ **Guía de recomendacións preventivas de saúde laboral ante o coronavirus (23 de xullo de 2020):**
http://issga.xunta.gal/portal/contido/documentacion/publicacions/divulgacion/doc_0111.html?lang=gl
- ▶ **Produtos virucidas autorizados en España:**
https://www.mscbs.gob.es/profesionales/saludPublica/ccayes/alertasActual/nCov-China/documentos/Listado_virucidas.pdf
- ▶ **Protocolo e guía de boas prácticas dirixida á actividade comercial en establecemento físico e non sedentario:**
https://www.mincotur.gob.es/es-es/COVID-19/Documents/Protocolo_y_Guia_de_buenas_practicas_para_establecimientos_de_comercio.pdf



A documentación elaborada pola Xunta de Galicia, a través do ISSGA, sobre recomendacións básicas para a prevención ante o coronavirus en distintas actividades sectoriais está dispoñible na páxina web: <http://issga.xunta.gal>